



## Universitätsbibliothek Paderborn

**R. P. Ioannis Evsebii Nierembergii Vita Divina, Sev Via  
Regia Ad Perfectionem**

**Nieremberg, Juan Eusebio**

**Antverpiae, 1644**

Capvt XXVI. Quibus in rebus nos cum divinâ voluntate conformare  
debeamus.

[urn:nbn:de:hbz:466:1-46802](https://nbn-resolving.de/urn:nbn:de:hbz:466:1-46802)

## 280 VITÆ DIVINÆ

nosque cum sanctissima ejus voluntate conformare, quando gustui illa nostro consentanea nobisque proficia est, commodumque nos in eâ nostrum clarissime cernimus; id verò parum habet admiratio-  
nis. Sequendo tunc quoque est, cum tam aperte id non videmus, resque cupiditati ac desiderio nostro prorsus adversatur; in modo Heliotropii, cum sole se, non sereno solū, sed & nubilo die circumagentis. (a) Abundè hoc in omnibus rerum eventis sufficit, Deo quidpiam placere gratumque esse; ut verissimè dictum sit à S. Ioanne Chrysostomo: *Si omnino dignus fueris agere aliquid, quod Deo placeat, aliam adhuc præter hoc ipsum, quod placere meruisti, mercedem requiris? Verè ignoras, quantum bonum sit, placere neq; si enim scires, numquam aliud aliquid extrinsecus mercedis aut munieris expeteres.* (b)

a Plin.lib.c.41. & lib.22.c.21. b Chrys libr.2.  
de compunctione cordis, mihi pag.59+

## C A P V T X X V I.

*Quibus in rebus nos cum Divina Volun-  
tate conformare debeamus.*

**A** Ge videamus nunc, quibus in rebus  
Dei nos deceat conformari voluntati.

Eas

C A P V T   X X V I . 281

Eas ajo esse res omnes , quæ à benigna ipsius manu, quâ mediatè, quâ immediatè, hoc est, quomodocumque proveniunt, atque aliquam nobis molestiam creare possint. *Primò*, itaque locum habeat oportet nostra hæc cum divina voluntate conformatio , in rebus quæ nobis desunt: item in vitæ hujus necessitatibus , in humilia-  
tionibus, in falsis testimoniis, in publicis privatisque nostris, & eorum quibus bene volumus , damnis ac calamitatibus : Deo immensas gratias agendo , quòd, cùm nobis animus decesset, ad nos vitæ I E S V Christi conformandos , ejusque paupertatem mundique commentum imitandum, ipsius Majestas nostram id vicem præstiterit , Vnigenitóque suo similes effecerit, atque à rebus terrenis & vitæ hujus tam periculosis prosperitatibus potenter abstraxerit avulseritque.

*Secundò*, Conformatio nostra exercenda est, in infirmitatibus & doloribus corporis; eodem modo gratias eidem Deo agendo , quòd pœnas peccatis nostris debitas supplere ipse voluerit, ne multum in altera vitaluendum superesset: qua in re insigne meritum, & singularis quidam favor benevolentiaque reperitur. Ecquis non gaudet,

deat, si mille ducatos debens, pro his solvere queat, cum sibi commodissimum est, & quidem monetâ minimâ? Onnes propter peccatorum nostrorum pœnas, Deo debitores sumus, si jam solutionem ad Purgatorium procrastinemus, magno ea dilatio nobis stabit, ob suppliciorum istic preferendorum magnitudinem: quæ si in hac vita anticipare velimus, levi id fiet negotio, ab iisque quamprimum, & egregio cum nostro compendio & quæstu libera- bimur. Pœnæ etenim Purgatorii maximæ sunt, neque illis ita facile satisfit, ut in hac vita re aliquâ modicâ. Adde, quod tantos cruciatus sustinendo, nihil admodum me- teamur: quidquid verò in hac vita pati- mur, ad alterius vitæ pœnas collatum, perexiguum sanè & minutum est, eoque tamen ipso plurimum & satis facimus, & promeremur: quæ dubio procul maxima est Dei clementia, ita res disponentis, ut in hac, non alterâ vitâ patiamur. quare de- cet nos conformemus ei, quod nobis in- primis est salutare,

Tertiò, Divinæ voluntati penitus con- sentiendum in privatione gustuum spiri- tualium, in ariditate, scrupulis & tentatio- nibus, quas Deus, ad exercitium majusque meri-

C A P Y T   X X V I . 283

meritum nostrum , etiam in personis admodum sanctis & spiritualibus , solet permettere , eosdemque , post multos , cum summa animi pace singularique fervore transactos annos , quasi ad prima suæ conversionis vitæque sanctioris initia & rudimenta revocare , nimirum quia frequenter usuvenit , ut , ad nos in humilitate conservandos , ita fieri omnino conveniat . Quare non est quòd propterea turbemur , aut immodecè cruciemur : sed annihilando nos , & in abyssum ac profundum nihili & miseriæ nostræ nos demittendo , in omnibus sanctissimæ ipsius dispositioni acquiescamus , atque ex animo gratias agamus . quòd sumptu tam exiguo , pœnâque tam parvâ , à malo , culpâque maximâ , qualis profectò est superbia & perditio nostra , defendere nos dignetur saluōsque præstare ; tum etiam , quòd otiosos esse nos nolit , æmulosque dare , quos vincendo , nobiliori ab ipso in cælis corona insigniamur . Omnibus itaque viribus , cura atque sollicitudine omni enitendum nobis est , ut Dei volūtatem exequamur , & ad mortem usque patiamur . Beato Iacopono adè cum Deo conveniebat , si omnibus consolationibus sensibilibus , etiam interioribus , destitueretur .

retur, adeoque hac in parte paterno Dei amore acquiescebat, ut diceret, clarum divini erga se amoris argumentum sibi fore, si, quod maximo affectu peteret, id ab illo sibi denegaretur. Desiderabat ille quoque, ob Majestatis istius amorem; omnia mundi tormenta, quin ipsa etiam Inferorum supplicia tolerare. Hæc tam illustris, gustus amorisque proprii victoria, pacem tranquillitatemque Viro sanctissimo admirabilem pariebat.<sup>(a)</sup>

*Quarto.* Humana voluntas ad divinam conformanda est, cum sibi quis à Deo plenè derelictus videtur & desertus, neque id solum secundum inferiorem animæ partem, ubi scrupulorum & temptationum molestiis miserrimè affligitur, verùm etiam secundum partem superiorem, quando nimicum animum, ut solebat, affectumque nullum homo sentit ad bene operandum, aut pro Deo patiendum & resistendum; eò quod nullas intellectus percipiat illustrationes, nullos voluntas pios motus, propita, alacritatem, robur ad patientiam: quando anima tota, velut retris nubibus obducta, arida & exsucca, non nisi summa

vi,

*a Raderus noster Viridarii parte 2, capite 3, fusè.*

C A P V T   X X V I .   285

vi, atque cum dolore, cor ad cælum potest attollere. Hoc quippe modo Deus sanctas aliquando animas exercere consuevit, estque illud inter maxima omnino tormenta, quæ in hac vita tolerari possent, numerandum, longè enim verò acerbius, quam crudelissimi, quos umquam ullus Martyrum in corpore suo pertulit, cruciatus.

Isto tam tristi perturbatoque rerum statu, dare nihilo-minus operam oportet, ut sine dolore, certè sine querelis simus, & cum divina voluntate conformes, deque tanta desertione minimè tristemur. noxia etenim potest esse hæc talis tristitia, si ab amore proprio nascatur, & in maximam pusillanimitatem desperationemque adducere: sed neque viribus industriaque humana è Purgatorio isthac spirituali, ubi animam in hac vita Deus attinet, eluctari quis potest & evadere. Illud unum tali in re ac tempore optimum factu est, ut magis se quis magisque in profundum nihil sui demergat, inque divinas manus penitissime resignet, & omni se bono indignum fateatur, infinitæque gratiæ ac benevolentiaæ divinæ adscribat, quod non pro eo ac merebatur, apud Inferos ardeat. Ac licet in eo se loco quispiam & conditione constitutum

tutum esse deprehendat, ut neque orare, neque Deo gratias agere, neque alium ullum internum virtutis actum exercere sibi posse videatur; hac se tamen ille cogitatione unâ soletur, Dei se, non suam implere voluntatem, & posse se semper velle quod vult Deus. Licet etiam in actibus resignationis,\* positivè & re ipsa eliciendis, parem molestiam difficultatemque experiatur. numquam tamen Deo resistat; sed negativè se habeat, sinendo Deum facere, quod ejus Majestati placet, & coram ipso quam profundissimè se demittat, prorsusque annihilet. Examinet se item, numquam culpâ aliquâ suâ causam desolationi huic (id quod majore cum periculo conjunctum est) præbuerit; deque ea culpa, non autem de pœna, sincerè apud animum suum doleat. Verum desolationes istæ sæpen numero existunt absque omni hominis culpa, singulari Providentiae Divinæ dispositione, Sanctos aliquos probare volentis, ut videat, veréne se, puréque & perfectè ament, suoque obsequio dicent: &

num  
• Consultò & libenter istis scholæ vocibus  
hîc atque alibi unumur, ut tanto melius  
intelligamur.

## C A P V T   X X V I . 287

num prompti parati<sup>que</sup> sint, ad sibi non gratis tantum, & absque solatiorum di-  
vinorum stipendio serviendum, verū etiam quoties asperè dure<sup>que</sup> habentur.  
Si enim divina Lex ipsos jubet *inimicos diligere*, (a) qui nos offendunt & læ-  
dunt: Deum, bene nobis volentem ac  
facientem, cur non diligamus, ei<sup>que</sup> fi-  
deles simus, tametsi severum se osten-  
dat atque inclementem? quod malo ipse  
irato<sup>que</sup> animo nequaquam facit; sed  
ideo, ut in Angelorum corona, de fide-  
litate sinceritat<sup>que</sup> nostra possit gloria-  
ri. Canem videmus, propter ossa paucu-  
la, quæ ipsi rodenda objiciuntur, eā adver-  
sus herum suum fide esse, ut, tametsi hic il-  
lum abigat fustēmque impingat, sequi ta-  
men eumdem, & blandiri adulari<sup>que</sup> non  
desinat. Quemdam certe fuisse constat,  
qui Canis, quem aluerat, fidem amicis &  
familiaribus demonstratus, ipsis præsen-  
tibus ad se accersitum illum, fœdum adeò  
in modum fustibus cœpit contundere, ut  
ossa confringeret: eo deinde relicto mox  
discessit. Canis attramen semi-jam-mor-  
tuus, & corporis reliquias quoquo modo  
trahens, herum crudelē sequi, illique  
allu-

a Matth. 5. v. 44.

## 288 VITÆ DIVINÆ

alludere & delicias facere perrexit. (a) Quantillum itaque facimus nos homines, parem Deo & Seruatori nostro fidem prestando, qui tantoperè nos honoraturus, atque gratum Angelis spectaculum factos, coram ipsis integritatem sinceritatemque nostram est deprehendatur, & narraturus quām præclarè de se sentiamus, sanctissimique Iobi exemplo, quocumque rerum successu, ex animo vereque amemus.

Caveat tamen diligenter anima, quotiescumque asperiorem sibi Deum sentire videtur, ne propterea existimet, eiusdem se gratiâ benevolentiaque excidisse: nam longè aliter res habet. atque ut concedam ipsis & largiar, etiam excidisse, adhuc non habet quamobrem honeste conqueratur: quandoquidem benignius molliusque tractari non meretur, quām Filium sibi carissimum tractaverit Pater Æternus, quando desertus ab omnibus planeque desolatus, infandos inter cruciatus, ex infan-

a. De Canum fide vide S. Ambrosium lib. 4. hexam cap. 4 Plinius lib. 8. cap. 40 toto. Scaligerum Exercitat. 206 num. 6. & Lipsium Centur. 1 ad Belgas, epist. 44. De aliis animalibus paria habes apud P. Ioan. Bapt. etiam Sancti-Jur. de cognit. & amore Christi lib. 1, cap. 7. sect. unicâ.

mi ligno pēdebat. Tunc temporis Christus ipse à Patre se derelictum fuisse, palam professus est: (a) eaque nocte, quā capiendus erat, cœpit contristari & mæstus esse; idque adeò, ut, Tristem esse animam suam usque ad mortem, (b) hoc est, mortiferā tristitiā confici se, excruciarique affirmaret. Quo rerū statu sine dubio tedium fastidiumque maximum suscipere in se voluit: illudque ipsum, quod optabile priùs & facile apparebat, tantāque gestientis animi voluptate cogitabatur, ut diceret, vehementissimè se exoptare tempus ac diem illum, quo baptizari deberet baptismō dolorum, à vertice nempe ad talos usque pœnis tormentisque variis repleri; & coarctari se; animumque suum affligi, quod desiderii istius expletionem proferri dilatarique videret: (c) illud, inquam, ipsum, acerrimo nupersummoque studio concupitum, usque eò deinde, in nostri languoris debilitatisque solatiū, fastidiavit, ut Caro pati detrectaret, quod agratissimis antea creberrimisque votis Dominus expetiverat. Verumtamen in desolatione hacten rædioque admirabili constitutus, profundissimè nihilo-minus, si umquam alias.

N defixam

a Matthæi 27. v. 46. b Matth. 26. v. 37, & 38.

c Lucæ 12. v. 20.

## 290 VITÆ DIVINÆ

defixam animo suo hæcere prioris decreti  
propositique radicem, & interius divinæ  
virtutis fundamētum, apertissimis ipse cla-  
rissimisque argumētis planissimè ostendit.  
Hinc factum est, ut ingenti magnoque ani-  
mo suum illud repeteret: *Non mea voluntas,*  
*sed tua fiat;* (a) atque ut singulari cum alacri-  
tate hostibus obviām progressus, intrepidè  
discipulos compellaret, diceretque, *Surgite,*  
*camus:* (b) letior, scilicet, paratiorque ad tra-  
dendum se in manus inimicorum, à quibus  
tam amarum lethiferumque sibi calicem  
porrigendam non ignorabat, quam ipsi-  
met essent ad capiendum, illustrissimum  
nobis hac ratione utilissimumque exemplū  
relinquendo, quo nos modo, desolationis  
ariditatisque tempore, gerere debeamus.

Plurimum sanè refert, (juvat etenim plu-  
ribus istud incūlcare) ne consolationes in  
Oratione putidè querantur, magnoque in  
discrimine versantur, quicumque easdem  
querunt. Eam ob causam non possum,  
quin hoc loco subjungam salutarem impri-  
mis, atque utilem doctrinam Venerabilis  
Patris Ioannis de Avilā, ita loquentis ac  
consulentis: *Abnega, inquit, totum id, quod te*  
*ad gustum & delectationem invitat: neq; eam*  
*pro-*

a Luke 22, v. 42. b Matth. 26, v. 46.

## C A P V T   X X V I .   291

procura antè, quām detur à Deo. Exercitatio  
tua & occupatio sit, purè & absq; solatio, in le-  
ctione pia, in precibus, pœnitentiis, confessioni-  
bus, communionibus, in obedientia & aliarum  
virtutum actionibus, pro Christo pati: sic enim  
recto itinere contendes, procul ab omni aberrādi  
periculo. Hac nimirum via est, quā Dei Filius  
hominibus monstravit: hæc illa Crux est, qua  
clavis instar, calum aperit omnibus, qui eam  
secum portant. Bone Deus, quām Tibi pauculi,  
quām sibi ipsis serviunt multi! Quot sunt sui-  
ipsius amatores, qui post te ambulare se dicunt,  
& ambulant post se-ipsos? Hæc velim unusquis-  
que consideret, studeatq; divina se voluntate  
conformare. illam pro fine habeat, non suas vo-  
luptates, sive oret, sive confiteatur, sive commu-  
nicet, sive quodcumq; aliud sanctū exercitium  
obeat. At subtilem hic fraudem cernere est, quā  
multos iea captos vidi, ut intēperanter incredi-  
biliq; cum desiderio, accedere gestirent ad san-  
ctissimū Eucharistia Sacramentū, non ad fru-  
ctum percipiendū, qui in Sacramentorū usu spe-  
randus est, & ob quem à Christo Domino sunt  
instituta, sed ut delectatiūculis suis ac lacrymis  
potirentur. Mella sectātur isti in rebus divinis,  
non verò Crucem, qua sola salutem est datura,  
clareq; itidem demonstrat, & nihil se proficere.  
& sodalibus præterea suis occasione præbere, ne

N 2

pro-

## 292. VITÆ DIVINÆ

proficiant: quæ mala si quis optat effugere, solam  
quarat Dei voluntatē, & contemnat cetera. O  
Amor proprius & philautia, quām verè in  
causā es, ne vitiis suis careant vel ipsæ res  
spirituales! Pulchritudo utiq; illa, quā Lu-  
cifer in cœlis desiderabat, spiritualis erat: sed  
quoniam ipsi non conveniebat, nec divinæ  
eam volūtati permittebat, fulminis instar ē  
cælo decidit, & voluptatē quærēdo, in mi-  
seriam īcidit sempiternam, suaque amisit,  
dum ad aliena miser aspirat. Quibus, obse-  
cro, rebus adductus Dei servus, quietem af-  
fectat animi, excellentiam sanctitatis, atque  
abundantiam gratiarum? Num fortè, ut si-  
bi-ipsi placeat, quando bene sibi esse adver-  
tit? an, ut placeat Deo? Hoc posterius si spe-  
ctat; tunc hominem Deo placere sciat, cūm  
illis contentus est, quæ ab ipso dantur: non  
autem, dum in iis conquiescit, quæ proprie-  
cupiditati blandiuntur. Si, Deo ita volente,  
desolationes tibi accidunt, si persecutio-  
nes ac mœrores, & mille incommoda alia valdē  
affligant, tuque interea bono sis animo;  
tum enim vero Dei te voluntati studere  
probabis, non tuæ. Lacrymas ipsorum  
Apostolorum, & quem præferebant amo-  
rem, nomen ac titulum amoris mereri  
Christus negat: amorem autem appel-  
lat,

C A P V T   X X V I .   293

lat, si Crucem suam, & absentis desiderium patienter ferant. *Si diligenteris me, ait, gauderetis utique, quia vado ad Patrem,* (a) Amare, est pati: amare Christum, est beneficiis malefacta compensare. Melius de Deo sensisti, quando pressâ irâ injuriam accepisti, pœnam latus subiisti, molestias vexationesque pertulisti, quam cum lacrimatus es, cum consolatione plenus, & extra re raptus fuisti. *Hoc sentite in vobis,* inquit beatissimus Apostolus, *quod & in Christo* (b) *Quod vero illud? contemptum, paupertatem, humilitatem, abjectionem, quam sensit ille, qui cum informa Dei esset, non rapinam arbitratus est, esse se aequali Deo: sed semet ipsum exinanivit formam servi accipiens.* *in similitudinem hominum factus.* (c) *Hic Jesus est Christi reliqui sensus sunt humani.* Sensus Filii Dei, isque nullo modo fallax aut mendax, est perfere pœnas, cruciari & affligi: sensus verò carnis, pascere se delitiis spiritus, haudquam immodecum expetendis, nisi minimè quæsitæ à divinal liberalitate sponte offerantur. Tu da operam ut velis, quod vult Deus; atque tum demum securus tibi per-

N 3 suade,

*a Ioan. 14. v. 28. b epist. ad Philip. 2. v. 5.  
c ibidem, v. 6. & 7.*

## 294 VITÆ DIVINÆ

suade, lacrymas tuas & devotionis, quam  
sentis, teneritudinem utilem esse, nihil hæ-  
sitans, rectâ te viâ ambulantem, nusquam  
offendere aut titubare. Quæcumque ad  
hanc normam & regulam exacta non sunt,  
mille crede erroribus fraudibusque ob-  
noxia. Fit quippe per frequenter, ut vehe-  
mentes isti spiritus atque erga Deum affe-  
ctiones, ex sensuali & imperfecto animo  
proveniant. verè enim Deus, uti pareat,  
non amatur; sed sensus ille & gustus sensi-  
bilis, qui dulcedinem istam & gaudium  
efficit circa Deum, & non circa divinam  
voluntatem. Non abnegârunt se istius-  
modi homines, nec sibi renuntiârunt,  
hoc uno ceteroquin modo apti futuri ad  
mandatorum divinorum observationem,  
quæ à vera caritate proficiscitur. Quan-  
tum suavitas illa perseverat, tantum pro-  
ficiunt, nec hilum amplius simulatque ea  
evanuerit; tum verò repente videoas ira-  
cos, inquietos, prudentes ad malum, in  
bono languidos, ad vitia effrenes: è qui-  
bus facile conficias, quod ajebam, eo-  
rum amorem non Deum spectâsse, sed  
ipsosmet; & consolatiunculae istius bolum  
magis in pretio fuisse, quam Christum.  
Hi tales simillimi sunt infantibus, quibus,

C A P V T   XXVI.   295

ut flere desinant, dulciaria mellitasque  
placentas præbemus: & cessant sanè illi  
quamdiu comedunt, verum à cibo ad eju-  
latum mox suum redeunt, manifesto do-  
cumento, non Patris imperio, sed brevi il-  
lā gustūs illecebrā captos, lacrimas se tan-  
tisper continuisse; nec obedientiæ, qua-  
lecumque moderationem istam, sed gu-  
læ commodiique proprii studio, ex integrō  
tribuendam esse. O quot hodie reperiun-  
tur ejusmodi parvuli, Deo immorigeri!  
qui si fortè contentiosè aut iniuriosè non  
agunt, si non murmurant responsantve, si  
ab inutilibus fabulis & maledictis absti-  
nent, si temporis rationem habere viden-  
tur, non id propterea faciunt, ut Deo pla-  
ceant, ejusq; jussa impigrè exsequantur; sed  
quod aliquod devotionis dulciarium pro  
voto acceperint, cuius interim gustu occu-  
pantur. Aufer illud, & nullo negotio obser-  
vabis, lacrimas & desideria ista non amoris  
divini fuisse, sed proprii: ita enim Deum  
offendunt & contemnunt, ut hac cessante  
dulcedine, totus quoque ille qualiscumque  
amor cesseret. quasi verò in prosperitate, re-  
rumque omnium abudantiâ, amicitiæ sin-  
ceritas cognosci queat, & non potius, cum  
laboribus, egestate, multipliciisque malorū

N 4

ac

## 296 VITÆ DIVINÆ

ac miseriarū genere oppressi jacemus. Nolim te nescire, ô bone, homines sāpē leves, nullius animi, & à Spiritū sancti gratia inopes, majori ex parte, atque ut plurimum, spiritualem hanc dulcedinem, interioremque affectum persentiscere, quem sinceri Dei amici non semper in se experiuntur: fierique assolet, ut facilius talibus permutaturis qui minus profecit, & imbecillior abjectiorique est animo, ac perfectæ consolationis naturā ignorat, ideoque devotiunculæ cujuspiam sensu oblato, continuò illum amplectitur, perinde ac si vera eo vita contineretur.

- Illud sedulò item diligenterque animadvertisatur oportet, suavitatem hanc & devotionis affectum, frequenter non ex copia & abundantia gratiæ proficisci, sed arguere animi, illius inopiâ laborantis, extremam paupertatem. Quis miretur, exigua & minimi valoris reculâ plurimum delectari pauperem. Exempli caussâ. Si vini generosioris haustum offeras homini, qui satis jam superque biberit, parùm illi gratum facies, nihilque admodum recreabis: at vero eundem sitibundo si dederis & vehementer desideranti, mirifice hunc gaudio exultantem conspicies. Similiter qui

## C A P V T . X X V I . 297

qui ebrii non sunt plenique vino divinæ caritatis & gratiæ , siquid in devotione suavius forbeant ; tanti id faciunt , ut jam sibi in cælo esse , & sempiterno ævo perfrui videantur . Ajunt , se à Deo visitatos ; lacrimas suas mirantur , vehementerque latantur ac triumphant : cum revera omnia ista modicum sint aut nihil . atque ut aliquid esse fateamur ; fortassis , uti diximus , quidquid id est , à caritatis spiritu usque indigentia progignitur . Qui autem masculo & genuino amore dives est ; in tanto pretio non habet devotionem sensibilem , neque illam sibi finem constituit ; sed ad patientiam , ad mortificationem propriam , ad amorem crucis , ad tolerantiam injuriarum , & ad reliquias virtutes exercendas , sibiique acquirendas eadem uitit : quod iudicitarū signum est , maximumque argumentum spiritu gratiæque exuberantis . Hac ex causa observabis , hominem rectum & perfectum , cum magnâ gratiæ copiâ & spiritualium donorum ubertate perfunditur , atque à Deo vocatur , non respondere per istiusmodi sorbitiones & gustationes ; sed alacritate quâdâ & vigore animi interiore , qui vivo serioque , pro eo qui vocavit , patiendi desiderio , & firmo divinam voluntatem

N s. 3. tatem

## 298 VITÆ DIVINÆ

tatem implendi proposito, decretoque ini-  
nititur. Ita Iob, *Vocabis me*, inquit, & ego  
*respondebo tibi.* (a) Et quomodo responde-  
bis, vir patienssime? quomodo verò, nisi  
patienter fortiterque tolerando res adver-  
tas; jacturam fortunarū, morbos, desertio-  
nes, plagas, paupertatem, tentationes Dæ-  
monis, & quidquid cruciat, aliasque virtu-  
tes strenuè exercendo. Ita Paulus Aposto-  
lus, simul Deum vocantem audiit, haud-  
quaquā ea respondit, quæ puerilem aliquē  
ad cōsolatiunculas istas affectum ostende-  
rent, sed generosum planeque virilem ma-  
gni animi sensum testatus ajebat: *Domine,*  
*quid me vis facere?* (b) velut dicturus, Habe-  
mi Deus, voluntatem meam tuæ subdi-  
tam; in ruas ipsam manus, integerrimè  
consigno: Tu eam accipe, & quod lubet,  
impera. Deus deinde ipse, suum esse  
Paulum, & à se unicè dilectum, atque ele-  
ctum, demonstratus, Ego, ait, ostendam  
*illi, quanta oporteat eum pro nomine meo*  
*pati.* (b) Hoc nimirum est indicium fidelis  
Christi servi: hic verus titulus eorum, quos  
præ cæteris ipse diligit. produnt illos non  
dulciariola suavesque istæ affectiunculae,

sed

a Iob 14. vers. 15. b Actor. 9. vers. 6. c ibidem.  
versu 16.

C A P V T   X X V I .   299

sed magna in laboribus , in angustiis, infamia, falsis restimoniis , inopia , necessitatibus , & iis omnibus quæ hominem afflidunt, carniq; ingrata ac molesta accidunt, magna, inquā, & invicta in hisce omnibus patientia. Illo pacto, Deo vacanti rectè beneq; respondetur. Divina etenim vocatio, insignia quædam ab eo quem vocat, & singularia obsequia exposcit , nisi Conditori ille suo turpiter velit esse ingratus. Quapropter tunc à Deo te vocari atq; moveri intelliges, cùm ipsi perfectâ divinæ voluntatis executione & impletione respondebis , etiamsi propterea fortunarum , vitæ, & honoris præsentissimum periculum fo- ret subeundum. Hæc res unā est, quæ hominem justum efficit perfectumque, & illustrem, ac Iesu Christo similem, si non nisi obiter, atque ut ita loquar , per modum sorbitiunculæ, in hac vita cōsolationes sentiat, perpetuus verò sit in exereitio crucis, nec minimum in ejus amore intepescat.

Adverte præterea, Dæmonem duledine nonnumquam & devotione aliquâ animum demulcere , quò spirituali hac gula debilitatem magnam inferat carni : atque ut animus sibi præfidens, multum fatigetur ; verum credendo esse spiritum

N 6

quem

## 300 VITÆ DIVINÆ

quem intus percipit, falsoque isthuc sapore  
illectus, immodecē se exerceat vigiliis,  
prolixioribus orationibus, nimiis jeuniis,  
& cibi somniique necessarij subtractione:  
quibus sine modo & mensura sanguis con-  
sumatur, atque ita hac immoderatione, ex-  
ercitia utiliora Deoque gratiora impedian-  
tur. Ex quo capite alter quoq; dolus existit,  
ut anima, cum his cōsolationibus abundat,  
perfecta sibi videantur. Hinc porro negligens  
efficitur, nec ulterius ad virtutes sibi  
comparandas contendit, de majore profe-  
ctu nihil quidquam solicita; quia purissi-  
mo, si Superis placet, Dei amore veroque  
spiritu abundē instrūcta.

Sed in aliam quoque insaniam hi tales à  
Dæmons abducuntur: quandoquidem sa-  
pore hoc & suavitate spiritus (ut ipsi appellant)  
imbuti, in omnibus viæ vitæque  
spiritualis exercitiis aliud omnino spectant  
nihil, præterquam sensum devotionis, ac  
delectationem, in ejusmodi cupedias effu-  
sissimi, voluptatum suarum sordidi gulosi-  
que amatores & sectatores, nec finem ha-  
bentes alium quam se-ipsos. unde sensim,  
justo Dei judicio, hic in gravia peccata, &  
post hanc vitam, in æternas tandem penas  
ac miseras labi permittuntur: quia excel-  
sus

## C A P V T   X X V I .

301

sus ille Dominus humani cordis intentio-  
nem & profundum contuetur. Atque uti-  
nam mi frater, cibi potusque delicias app-  
petivisses potius, & carni tuæ, factus ventris  
inancipium, hoc delectationum genere sa-  
tisfecisses! nam ex ipso tandem fastidio,  
malo tuo medicina nata esset. Utinam sua-  
vitatem illam sensuum divinorū expertus  
numquam essem: quia futurum erat, ut aesti-  
mare eos nescires, atque eo loco habere  
quem merentur, virtuti, nimirum, patien-  
tiæ, & crucis exercitio eosdem postponen-  
do! Sapor quippe iste prior forte num-  
quam in tantum te decepisset, ut ipse fieret  
finis operum tuorum, cum ignorare non  
possis, certè non debeas, Magistrum no-  
strum Christum Iesum, Crucem sibi pro-  
positam semper habuisse, à Cruce vitæ ini-  
tium duxisse, & in eadem cruce amore tui,  
vitam clausisse: idque ideo, quod verus &  
germanus amor in virtutum lateat profun-  
do, turbidisque se rebus præcipue exserat.  
Atque hoc idem de reliquis affero virtuti-  
bus, sicuti si initium sincerumque humili-  
tatis ac patientiæ desiderium mentem ve-  
hementius accendat, notatur quamprimum & appetet hic amor exterius; cum ea  
qua dolore adferunt, animo quieto &

N 7

ju-

jucundo, aut saltem non iniquo, tolerātur: quod ipsum si in Dei fiat gratiam, de amoris sinceritate nefas sit dubitare: alia verò omnia suspecta sunt, nec solido nixa fundamento. Non paucorum hoc tempore sanctitas magnis constat desideriis in oratione, & magnis vicissim peccatis in conversatione. In illa deflemus Christi patientis dolores, at non diù pōst, fratribus nostris & proximis eosdem conamur infligere. In illa veneramur patientiam filii Dei: per iram deinde omnia facimus. in illa per horam unam silemus: post illam dies totos fabulis conterimus. Si planè de spiritu profectuque nostro loquendum sit, hoc unum impensè laboramus, ut silentio aliquo & oratione, ac cogitatione de Deo suscepimus, velut pretio, ad solatia utamur & delectatiunculas hasce colligendas, tum verò postea iidem ut simus, qui ante. facta est igitur & vana nostra sanctitas: numquam etenim crescit, neque id agimus, quod unum maximum est omnium, & in quo sunt omnia. Multi, prō dolor! multi hoc itinere incedunt, totoq[ue] idcirco cælo aberrant. Deus Opt. Max. iis misereatur & medeat[ur]. Amen.

Res est profectò, quæ videntes meritissi-

mō

## C A P V T   X X V I . 305

mō percellat & obstupefaciat, in tantā taliū  
multitudine, paucissimos esse, qui errorem  
suum agnoscant. Interroga illos, & vide,  
num quem ex omni turbā reperias, qui non  
credat constanterque asleveret, eò quòd te-  
nerè afficiatur & lacrimas fundat, perfe-  
ctum jam se esse, plurimum sapere in rebus  
spiritualibus, eaque sanctitate præditum,  
quæ nou uni sibi, sed aliis insuper sufficiat:  
adeoque certa se & manifesta signa habere  
ac pignora sedis, in felicissimo Dei regno  
aliquando sibi assignandæ. Omnis hæc te-  
meraria & stulta confidentia nascitur è re  
admodum periculosa & multis communi,  
quæ est defectus cognitionis veri spiritūs  
Dei, dum suæ quisque opinioni adhæret,  
idque melius iudicat, quod placet, quām  
quod oportet: & sequendum sibi ducem  
credit appetitum potius devotionis sen-  
sualis, quām spiritum & doctrinam Chri-  
sti, præcipientis, ut se in omnibus homo  
abneget, ut voluntatem suam divinæ pe-  
nitūs conformet, atque ut studeat per-  
fectæ sui ipsius mortificationi. Hinc infe-  
riores animæ vires pravæque cupiditates  
tam sunt vegetæ, feroce & insolentes, ut  
miseriis istis obnoxius, è secessu spirituali,  
in quem se abdiderat, vix ad homines re-  
gres-

## 304 VITÆ DIVINÆ

gressus, propriam continuò quærat aestimationem. Amabo te, mi frater, quid istuc rei est : Ibi solitudinis amans recludis te, & strepitu omniem vulgi que celebritatem odiisse videris, tibi uni & Deo tuo vacaturus : hic à meditatione pia etiamnum recens, iuanis gloria appetentior, inclarescere optas, laudesque ubique tuas decantari, Ibi peccata deploras : hic iterum deploranda committis. Ibi pulverem te esse affiras, cænum & cinerem : hic jurare penè ausis, cælum esse te, meliorique quam ceteros ac nobiliori carne & sanguine compositum ; cum tamen omnes unius atque ejusdem simus vitis palmites, aqua ex eodem hausta fonte, ab eadem nati radice fructus. Laudas ipse te, venditasque magnas illas, quas in oratione didiceris, veritates, deque eximia quadam & rara divinarum rerum cognitione gloriaris : atqui hic plenum te nos immanibus mendaciis & miserabili cæcitate deprehendimus. Considera, quæso, ipse te attentius, & cognosces, totum te carnalem esse, propriæ voluntatis studiosissimum, ac res tuas amantem & deprædicantem idque, quod dolendum est atque pendendum, non sine gravi ipsorummet spiritualium exercitiorum

## C A P V T   X X V I I .   305

rum infamia: quoniam ita iis exteriūs occuparis, ut ob tuam perversitatem & malignitatem, nihil proficias interiūs. Quibus miseriis malisque omnibus dubio procul medeberis, si solam quāras voluntatem divinam, & nullibi, ne quidem in rebus sanctis ac piis, delectationem propriam consectoris. (a)

(a) Consule Blosium Tabellæ spirit. §. 3. nu 7<sup>o</sup>  
& §. 4. num. 1. Instit. spirit. cap 7. Marga-  
ritis spirit part. 4. §. 5. & alibi.

## C A P V T   X X V I I .

*Gradus humana cum Divina Voluntate  
conformatio[n]is.*

V T perfectam cum divina voluntate conformitatem assequamur in iis, quæ proximè superiori Capite percensuimus, rebusque incommodis, tam intrinsecis, quam extrinsecis, in doloribus, infamia, necessitatibus, & afflictionibus planè omnibus; per ejusdem nos Conformatiatis Gradus oportet ascendere, quos idcirco indicare pergo.

Primus Gradus est, Quidquid Deus immittit, patienter minimeque invitum aut repugnantem ferre, quantumvis molestæ res sunt casu[s]que adversi: neque tamen  
*ideò*